

Prome Minister Evelyn Wever-Croes:

E meta primordial cu regulacion di UTV y ATV ta pa garantisar seguridad den trafico y pa e peatonnan



Diamars 13 di Augustus, Consejo di Minister tabata tin un reunion cu e comision encarga cu regulacion di e vehiculonan UTV y ATV. Prome Minister Evelyn Wever-Croes a indica cu na aña 2022, Gobierno a insitui un comision di nobo pa pone un poco mas atencion na e tipo di vehiculonan aki, mirando cu no semper nan ta safe y tabata envolvi den accidentenan basta

grave den pasado.

Gobierno a bin ta haya varios keho, di habitantenan cu ta biba mas den areanan na unda e vehiculonan aki ta pasa, pa motibo di desorden cu nan ta haci y e stof cu nan ta lanta. Tambe kehonan ta drenta cu ora e vehiculonan aki ta riba caminda, nan ta para y stroba trafico. Y e efecto cu e vehiculonan aki tin riba naturalesa tambe ta preocupante.

E atraccion aki ta uno hopi gusta pa nos bishitantenan y pa e motibo aki, e comision encarga a bin ta traha ya caba un aña riba diferente posibilidad pa mantene na un manera safe. Departamento di Transporte Publico a duna un presentacion con pa efectua un miho control riba e vehiculonan aki, Dienst Technische Inspectie (DTI) a mustra e partinan di peliger cu tin, y Departamento di Impuesto a bin cu un proposicion pa crea



un categoria nobo, special pa por registra e tipo di vehiculonan aki.

E meta primordial di Gobierno ta pa regula y bin cu rekisitonan cu tur compania cu ta ofrece e vehiculonan aki como atraccion, mester cumpli cu ne. E vehiculonan lo mester wordo "gekeurd", y nan mester ta segura y cumpli cu exigencianan di seguridad pa asina por garantisar cu tur hende ta sigur. Gobierno tambe ta trahando riba rutan alternativo pa evita cu e vehiculonan akita pasa tur caminda y destrui naturalesa. Aki e departamento di naturalesa y medio ambiente tin un rol sumamente importante pa asina bin cu e cambi-

onan den ley necesario.

Otro tema importante cu a wordo discuti ta e stepnan, segway, scooter y e-bikes. Algun di nan ya caba ta cay den categoria conoci pero otro no. Prome Minister a expresa cu un step of segway no ta vehiculonan cu mester ta riba caminda ni banda di caminda, pasobra no tin permiso pa esaki. Mirando cu ya tin companianan cu ta ofrece e medio di transporte aki, lo mester sinta cu nan pa delibera con pa yega na regula esakinan tambe. Pa Gobierno segura seguridad den trafico y pa nos peatonnan ta primordial, y p'esey lo traha duro na yega na decisionan beneficoso pa tur envolvi.

Minister Rocco Tjon:

A trata desaroyo di departamento di alto mando di cuerpo policial di Aruba

Diamars mainta, Minister di Husticia y Asuntonan Social sr. Rocco Tjon, a reuni cu e ekipo di Alto Mando di Cuerpo Policial di Aruba, pa tuma cierto decisionnan riba nivel strategico.

Manera ta conoci, den e ultimo añanan a inverti hopi den Cuerpo Policial pa loke ta trata infraestructura y material, y awo ta invertiendo den e parti di personal, pa asina por mancha e scarcedad cu tin actualmente. Diferente proyecto lo wordo cristalisa den e lunanan nos dilanti, pues a reuni riba e proyectonan aki, pero tambe pa garantisar e continuidad den aña 2025. Na october 2024 e klas nobo di Cuerpo Policial lo inicia cu 20 Agente Policial y dia 1 di november e otro klas lo inicia.



Banda di esaki, a haci palabracion pa na aña 2025 percura pa mas personal pa Cuerpo Policial, no solamente pa e departamentonan ehecutivo, pues Polis Uniforma, pero tambe pa departamentonan di sosten manera Bedrijfsvoering y HR, cual tambe ta sumamente importante.

A toca e proyecto di "Mobile Data Terminals", cual ta un deseo grandi di parti di Cuerpo Policial pa por tin e computernan instala den nan

vehiculonan, pa di e forma ey nan por poseer di mas informacion y asina nan por traha mucho mas eficiente, brinda un miho servicio na comunidad y alabes garantisar nan propio seguridad. E proyecto aki ta den su fase final, pa asina por inicia cu e proyecto piloto e aña aki.

Tambe, a tuma algun decision a largo plaso, pa cuminsa prepara diferente renobacion grandi cu mester tuma luga, entre otro e opleidingsinsti-

tuut, lo bay finalisa e trabounan pa di e forma ey tambe por inicia cu e destaho pa asina por renoba esaki por completo.

Otro proyecto hopi importante ta e parti di sigui amplia seguridad den trafico, ya caba for di ministerio a aproba e fondonan adicional pa di e forma ey corte por garantisar mas "verkeerszittingen", pa na momento cu infraccionnan den trafico wordo comet, nan por atende cu e

partinan aki mesora den corte.

Por ultimo, pa loke ta Cuerpo Policial, e proyecto cu yama "takel en bewaardiensten" ta den su fase final, e contracto cu e compania cu a gana esaki ta wordo termina awo, pa dentro di poco esaki no ta un "knelpunt" mas pa Cuerpo Policial, y asina na momento cu e Agente constata cu un auto no ta cumpli cu diferente rekisitonan, e por kita e auto mesora for di caminda y un partner lo garantisar pa ful e maneho di e parti aki, y asina nunca mas lo tin un scarcedad di luga caminda e Agentenan Policial no por kita un auto for di caminda, esaki ta eleva seguridad den nos trafico. Pues, aki tres luna lo bolbe reuni cu Alto Mando pa asina wak e avansenan di tur loke a wordo palabra durante e reunion aki.